



Minggu, 02 April 2023

Ogen : Hosea 11:5-12



Mekeng



Kiniseran megati jadi i bas kegeluhen. Banci jadi erkiteken ngelakoken kebenaran kata Dibata, tapi banci ka erkiteken perbahanen (pengelegita). Hosea nuriken maka bangsa Israel ngalaken kiniseran; pecah perang jadi bas kerina kuta-kuta, pintu-pintu gerbang pe rontas kerinana. Nderkuh me ia erkiteken beratna pasangen si man baban, latih kel akapna, la lit sinampatisa i bas ngangkat pasangen (perbeben) e. Kai ndia sabapna? Bangsa Israel enda mekeng. Nilah i bas Dibata nari, isembahna dibata-dibata sideban, la ia nggit mulih kempak Dibata, ilupakenna kerna kekelengen Dibata man bana. Banci sikataken maka kiniseran e jadi erkiteken pengelegina, sirangina Dibata, akapna beluhen dibata-dibata sideban guna engkeleng ia. Ulihna kecedan ate, rate mesui ras kebenen. Tapi pusuh Dibata la ngasup natap bangsaNa i bas kelsehen, minter erkusur pusuhNa erkiteken kekelengen. IA me Dibata si perkuah, labo manusia si erbalas e maka reh IA ku tengah-tengah bangsaNa. Perbahan kekelengenNa e me bangsa enda reh mulihken man Dibata. Meter ia reh bagi perkabang perik, bagi merpati mulih ku rumahna. Janah enda me arapen Dibata jadi nandangi bangsana si enggo ndauh sirang ras IA.

Senina Moria sikelengi Tuhan tole siukuri i bas kerina perbeben sinialaken kita, kune i bas geluhta jadi pecah perang, entah sangana runtuh sontar erkiteken buena perbeben, ola pekeng pusuhna, dahilah Tuhan. Gegeh ras beluhta jine la ngasup ngalaken persoalen e. Dahilah Tuhan! PusuhNa erkusur man sierlebuah sabap IA perkeleng dingen perkuah. IA lit i tengah-tengahta, la ndigan pe kita i tadingkenNa.

☞ Pusuh si mekeng pesirang kita ras Dibata